



CONCELLO
DE
CABANAS

ACTA DA SESIÓN ORDINARIA DO PLENO DA CORPORACIÓN REALIZADA O 26 DE ABRIL DE 2017.

Concelleiros asistentes:

D. Manuel González López
D. Julián Ramón Seijas Criado.
Dª. Esperanza Gayoso Pereiro.
D. Javier Fernández Brage
D. Delfín Feal Pereira.
D. Carlos Ladra Brage
Dª. Concepción Rodríguez Ferreiro
D. Iago Varela Martínez.
Dª. María Eva García Amor
D. Xosé Manuel Pérez Sardiña

No salón de sesions da Casa do Concello de Cabanas, sendo as dezanove horas e trinta minutos do día vinte e seis de abrilde dous mil dezasete, en primeira convocatoria e baixo a presidencia do Sr. Alcalde Germán Castrillón Permuy, coa asistencia dos Sres. Concelleiros relacionados á marxe e do Secretario titular Antonio López Vila, reúñese o Pleno da Corporación en sesión ordinaria segundo a convocatoria remitida ao efecto.

Unha vez comprobada a existencia de quórum para a válida constitución do Pleno, a Presidencia declara aberta e pública a sesión, procédese a trata-los asuntos incluídos na Orde do Día.

1.- APROBACIÓN SE PROcede DE ACTA DE SESIÓN ANTERIOR. Dáse conta da acta da sesión realizada o día 31 de decembro de 2016, da cal entregouse copia coa convocatoria a tódolos concelleiros; o Sr. Presidente pregunta se algún membro da Corporación ten que formular algunha observación, e non presentándose alegacións, o Pleno da Corporación en votación ordinaria, covoto a favor dos once membros que o compoñen, acorda aproba-la referida acta.

2.- CONVENIO DE COOPERACIÓN ENTRE A SECRETARÍA XERAL PARA O DEPORTE E O CONCELLO DE CABANAS PARA A CONSTRUción DUN CIRCUÍTO DE MOTOCROSS. Visto o escrito de data 29 de marzo de 2017, que achega a Subdirectora Xeral de Xestión Deportiva e no cal solicita documentación para sinatura do convenio de cooperación entre a Secretaría Xeral para o Deporte e o Concello de Cabanas relativo a obra de construcción dun circuíto de motocross, acompañando o texto do convenio a subscribir.

Visto o proxecto técnico para construcción dun circuíto permanente de motocross na parcela H8 no Polígono de Vilar do Colo, redactado polo enxeñeiro de camiños Francisco Barea Paz e asinado en data 5 da agosto de 2015 e pendente de visado, cun orzamento de 20.661,16 euros e 4.338,84 euros de ive, o que importa un total de 25.000,00 euros.

No expediente constan tamén, informe do arquitecto municipal asinado en data 8 de abril de 2016 no que se refire a proxecto de construcción circuíto de motocross en Cabanas, fase 1, redactado polo enxeñeiro de camiños Francisco Barea Paz en abril de 2015 cun orzamento de 34.998,34; resolución de autorización para obras de instalación dun circuíto de motocross na zona de polcía do río Baa no polígono de Vilar do Colopolo Director de Augas de Galicia de data 16 de novembro de 2016; Resolución do 2 de febreiro de 2017, da Dirección Xeral de Calidade Ambiental e Cambio Climático pola que se formula o informe de impacto ambiental do proxecto do circuíto de motocross en Cabanas; anexo sobre informe de viabilidade do circuíto de motocross de Cabanas; nota de inscrición no Rexistro da propiedade de Pontedeume da parcela



CONCELLO DE CABANAS

H8 a favor do Concello de Cabanas, uso deportivo e unha superficie de 14.854,45 m², referencia catastral da parcela 6706506NJ6160N0001SI.

Visto o ditame favorable da Comisión de Asuntos do Pleno, así como o voto particular presentado polo concelleiro Xosé Manuel Pérez Sardiña.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista; o voceiro Delfín Feal Pereira manifesta que nos plans do grupo socialista non entraba a construcción pero o fomento do deporte e nos camiños das zonas rurais hai movemento de motos con deterioro de pistas e molestias á veciñanza, á vista dos informes favorables e o convenio favorable estima que pode ser un bo investimento, en canto a seguridade e homologación considera que debe ser unha vez construído; con respecto ao voto particular recolle cuestións que dixo na Comisión, pero logo o punto de acordo non é nada con respecto ao dito, segue a manter o voto favorable.

Polo grupo Mixto: o concelleiro do BNG Iago Varela, ten dúbidas desde o punto de vista ambiental, cultural e económico, dada a proximidade do río Baa e camiño inglés, en Cabanas hai un moderado seguimento do motocross como deporte, en principio non ve mal a dotación de instalacións deportiva para tódolos deportes, hai que avaliar si se está a facer un bo uso dos recursos, si hai retorno á sociedade, este circuito non vai ser só para a veciñanza de Cabanas senón para uso xeral e o mantemento o vai asumir este Concello sen que se xustifique o beneficio para a veciñanza de Cabanas e a súa situación no polígono vai ser complicado o retorno do diñeiro investido, pide que se repense o proxecto e demostren hai retorno económico ou social beneficioso para a veciñanza e que se poida tratar no próximo pleno.

A concelleira de AEC María Eva García Amor, ve positivo dotar de novas actividades deportivas ao Concello, tendo en conta que para a construcción se pode dispoñer dunha subvención de 25.000 euros, os informes favorables do arquitecto municipal e de Augas de Galicia, así como a viabilidade económica, non ve ningún impedimento para asinar este convenio, recordando o deber de vixiar cando se comecen as obras o cumprimento das normas urbanísticas e que se cumpran os requisitos técnicos para a homologación e uso de dito circuito.

O concelleiro de PDDdG Xosé Manuel Pérez Sardiña, indica que presentou o voto particular porque observa unha serie de obxeccións que faltan na memoria, como detalles de curvas, rectas, etc., inda que a homologación sexa posterior o proxecto debe cumplir coa normativa básica na materia, non hai informe sobre tal extremo e alude a posibles complicacións en caso de accidentes, é un deporte de risco e débese facer unha valoración máis ampla, fala que se está a duplicar o servizo na Comarca pois xa existe un en Narón e a Xunta debería ter unha mellor planificación, considera que o estudio económico para a viabilidade dun circuito deste tipo ten un custo moi superior ao que aquí se presenta, e critica que non se cree nin un solo posto de traballo, non pode aprobar isto tal como está, o Concello terá que asumir o mantemento e tamén probas da federación ou a Xunta de Galicia, gustarialle saber as contías que debe asumir o Concello para estas competicións porque así está no Convenio, pide outro tipo de actividades máis acordes co entorno como ciclocross ou outras nas que haxa intercambiabilidade, unha infraestrutura que non sexa cun único fin.

Polo grupo Popular o concelleiro Javier Fernández Brage, alude ao voto particular indicando que o Decreto 2234/1971, do 13 de agosto, non lle ve relación algunha coa futura instalación do



circuíto de motocross na parcela clasificada como uso deportivo no Polígono de Vilar do Colo, o uso que se lle vai dar é o da lei e polo tanto non entende que se poñan atrancos, o visado do proxecto é cuestión de días e non ignora a afección do río Baa contando coa pertinente autorización de Augas de Galicia, o proxecto pasou por tódolos trámites e someteuse a exposición pública sen que se presentase reclamación algúnh; en canto a realización de probas obsérvase o seu descoñecemento pois para participar hai que estar inscritos no campionato e tódolos gastos son financiados polo organizador ou polos patrocinadores, no informe de viabilidade consta que é sostible, as taxas van ser asequibles e a previsión de tarifas sería 5 €/hora para uso puntual e para un uso estableceríase un prezo/mes cun límite de horas, isto regularíase na correspondente ordenanza; en canto ao acordo que propón non habería inconveniente en mancomunar a xestión con outros concellos unha vez que estea en funcionamento e sempre que estivesen interesados, estarán sempre abertos a compartir outras actividades unha vez que o circuíto vote a andar, recorda que este proxecto tamén é sostible ambientalmente, por todo o exposto rexeitarán o voto particular.

O Sr. Feal Pereira reitera o voto favorable a este convenio e espera que na elaboración de taxas e ordenanza de uso se teña en conta as aportacións de tódolos grupos.

O Sr. Varela Martínez considera que o voto particular presentado recolle os puntos que tamén teñen na súa intervención polo tanto votaran a favor do mesmo.

A Sra. García Amor opina que a hora de tomar decisións teñen que basearse nos informes dos expertos sobre a materia, entende que repercutirá favorablemente na veciñanza e captación de afeccionados doutros concellos que ata agora tiñan que desprazarse a Lugo e tamén debemos ser pioneiros como noutras actividades.

O Sr. Pérez Sardiña entende que o Decreto 2234/1971, do 13 de agosto si ten repercusión como saltarse o trámite de avaliación ambiental arbitrariamente a través de amigismo da Xunta, había que ter unha planificación comarcal doutro xeito e non traer isto sen consultar a ninguén, en Cabanas tamén hai afeccionados a outras disciplinas deportivas que non teñen en conta, é un adorno electoral, alude ao peche do circuíto de Ferrol, o estudio de viabilidade económica non ven asinado por ninguén e non crean nin un posto de traballo, é claramente elitista e non vai destinado a maioría da poboación, deixando outras necesidades como rede sumidoiros, insiste en solicitar unha alternativa e que se fagan as cousas ben.

O Sr. Fernández Brage, pide ao concelleiro de PDDdG que sexa máis coherente coas súas propostas e serían moito más válidas, busca impedimentos para investimentos no Concello e recorda que o proxecto xa está aprobado e o que queren é abordar ese investimento financiado ao cen por cen que será beneficioso para todos.

O Sr. Alcalde di que hai cousas que non son certas e debe aclaralas, e alude ao accidente no circuíto de Karts que mencionara o Sr. Pérez Sardiña, en calquera deporte pode ocorrer, cita novedades de remodelación de circuítos deste tipo como Cerceda, As Neves, Lugo, na actualidade hai moita afección; en canto a traballadores acábase de contratar un operario de servizos múltiples que tamén pode participar nestes traballos, tamén fai referencia as tarifas que están previstas e que sería menos gastos que o simple desprazamento a Lugo por exemplo, a realidade é distinta do que di no papel, non se saltou ningún trámite, están tódolos informes.

A continuación a Presidencia somete a votación o voto particular presentado polo concelleiro de PDDdG Xosé Manuel Pérez Sardiña, resultando dous votos a favor do concelleiro



CONCELLO DE CABANAS

do BNG e concelleiro de PDDdG, seis en contra dos membros do grupo Popular e concelleira de AEC, e tres abstencións dos membros do grupo Socialista, quedando rexeitado.

A seguir sométese a votación o asunto relativo ao convenio coa Secretaría Xeral para o Deporte, para construcción do circuíto de motocross en Vilar do Colo.

O Pleno da Corporación en votación ordinaria, con nove votos a favor dos membros dos grupos Popular, Socialista e concelleira de AEC, un en contra do concelleiro de PDDdG e unha abstención do concelleiro do orzamento BNG, acorda:

1º. Aprobar o proxecto técnico para Construcción de circuíto de motocross, na parcela de uso deportivo de titularidade deste Concello de Cabanas, H8, Ref. catastral 6706506NJ6160N0001SI, cunha superficie de 14.854,45 m², no Polígono de Vilar do Colo, redactado polo enxeñeiro de camiños Francisco Barea Paz, asinado en data 5 da agosto de 2015 e pendente de visado, cun total de 25.000,00 euros, fixando como uso específico o de circuíto de motocross.

2º. Aprobar o texto de convenio de cooperación entre a Secretaría Xeral para o Deporte da Xunta de Galicia e o Concello de Cabanas (A Coruña) para a construcción dun circuíto de motocross, que a continuación se transcribe;

CONVENIO DE COOPERACIÓN ENTRE A SECRETARÍA XERAL PARA O DEPORTE DA XUNTA DE GALICIA E O CONCELLO DE CABANAS (A CORUÑA) PARA A CONSTRUCCIÓN DUN CIRCUITO DE MOTOCROSS.

En Santiago de Compostela, a ... de... de 2017.

REUNIDOS

A Sra. Dona Marta Mínguez Telle, Secretaria Xeral para o Deporte da Xunta de Galicia, en exercicio das competencias desconcentradas nos secretarios xerais dependentes da Presidencia, en virtude da Disposición Adicional Segunda do Decreto 88/2013, do 30 de maio, da estrutura orgánica dos órganos superiores e de dirección dependentes da Presidencia da Xunta de Galicia.

O Sr. Germán Castrillón Permuy, Alcalde do Concello de Cabanas (A Coruña), ao abeiro do disposto no artigo 21.1.b) da Lei 7/1985, do 2 de abril, reguladora das Bases de Réxime Local, e no artigo 61.1.a) da Lei 5/1997, do 22 de xullo, de Administración Local de Galicia.

Actuando ambos coas facultades que os seus respectivos cargos e habilitacións lles confiren,
EXPOÑEN

I.- A Lei orgánica 1/1981, do 6 de abril, do Estatuto de Autonomía de Galicia, no seu artigo 27.22, sinala a competencia da Comunidade Autónoma de Galicia en materia de promoción do deporte.

O Decreto 88/2013, do 30 de maio, polo que se fixa a estrutura orgánica dos órganos superiores dependentes da Presidencia da Xunta de Galicia, atribúe á Secretaría Xeral para o Deporte as competencias da comunidade autónoma en materia de deportes.

A Lei 7/1985, do 2 de abril, reguladora das bases de réxime local, dispón que os concellos exercerán, en todo caso, competencias, nos termos da lexislación do Estado e das Comunidades Autónomas, entre outras, nas seguintes materias: promoción do deporte e instalación deportivas e de ocupación do tempo libre (artigo 25.2.l).

No marco da lexislación básica do Estado, a Lei 5/1997, establece que os concellos exercerán, entre outras, competencias en materia de actividades e instalacións culturais e deportivas (artigo 80.2.n), e poderán celebrar coa Xunta de Galicia convenios de cooperación para unha xestión máis eficaz das súas competencias (artigo 198).



CONCELLO DE CABANAS

A Lei 3/2012, do 2 de abril, do deporte de Galicia, contempla no seu artigo 8 a posibilidade de colaboración da Administración deportiva autonómica coas administracións locais.

II. As administracións públicas asinantes deste convenio son conscientes de que o incremento e mellora das condicións que esixe a práctica deportiva reclama unha mellor dotación de infraestruturas, de forma que permitan dar satisfacción á crecente demanda social existente na materia.

A Secretaría Xeral para o Deporte, no exercicio das súas competencias e funcións, ten previsto na súa planificación de mellora de infraestruturas e dos equipos deportivos da Comunidade Autónoma de Galicia, actuacións que permitan a construcción ou mellora de instalacións deportivas básicas ou daquelas que presenten un maior interese deportivo. Neste sentido é de interese da Secretaría Xeral para o Deporte da Xunta de Galicia, a colaboración coas administracións locais para o fomento do deporte no ámbito municipal.

A necesidade de levar a cabo esta actuación, ven determinada pola importancia deste concello para a promoción de deporte do mundo de motor en toda a comarca que comprende, sendo unha actuación necesaria para continuar co desenvolvemento de motocross que é xunto co Karting, a verdadeira escola do deporte de base para o automobilismo deportivo. Desta circunstancia derívanse as razóns que acreditan o interese público da actuación, e xustifican a dificultade da súa convocatoria pública, de acordo co disposto no artigo 26.2 da lei 9/2007, do 13 de xuño, de subvencións de Galicia, atendendo tamén ao establecido no Decreto 193/2011, do 6 de outubro, polo que se regulan especialidades nas subvencións ás entidades locais galegas.

Por todo o anterior, a Xunta de Galicia, por medio da Secretaría Xeral para o Deporte, e o Concello de Cabanas (A Coruña), deciden subscribir este convenio que se suxeitará ás seguintes,

CLÁUSULAS

Primeira: OBXECTO DO CONVENIO

É obxecto deste convenio establecer as bases de colaboración entre a Xunta de Galicia, a través da Secretaría Xeral para o Deporte, e o Concello de Cabanas para a construcción dun circuito de motocross de acordo co proxecto técnico redactado polo enxeñeiro de camiños, canais e portos, Francisco Barea Paz.

Segunda: COFINANCIAMENTO DAS ACTUACIÓNS

O importe total das actuacións a realizar ao abeiro deste convenio ascende á cantidade de VINTE E CINCO MIL EUROS (25.000,00 €) IVE incluído.

A Secretaría Xeral para o Deporte subvencionará ditas actuacións achegando ao Concello de Cabanas a cantidade de VINTE E CINCO MIL EUROS (25.000,00 €), con cargo á aplicación orzamentaria 04.40.441A.760.0 (código de proxecto 2013 000 39) do seu orzamento de gastos para o exercicio 2017 con fin de posibilitar a contratación da obra á que se refire o presente convenio, de acordo coa seguinte cantidade:

Terceira: OBRIGAS DAS PARTES

3.1. Obrigas do Concello de Cabanas.

1.- As obras serán realizadas polo contratista que fora seleccionado polo Concello, dando conta á Secretaría Xeral para o Deporte da elección, así como de calquera modificación do proxecto, prorrrogas de prazos establecidos na adxudicación ou alteracións de calquera outros elementos básicos que configuren as actuacións.



CONCELLO DE CABANAS

En tódolos casos de contratación con terceiros, o Concello actuará con suxección, tanto na tramitación do procedemento de contratación, como na execución do contrato administrativo, ao establecido no Real Decreto Lexislativo 3/2011, do 14 de novembro, polo que se aproba o texto refundido da Lei de Contratos do Sector Público, atendendo tamén ao preceptuado no artigo 12 do Decreto 193/2011, do 6 de outubro.

2.- Son obrigas do beneficiario as sinaladas nos artigos 14 e 37 da Lei 38/2003, do 17 de novembro, xeral de subvencións e nos artigos 11 e 33 da lei 9/2007, do 13 de xuño, de subvencións de Galicia, e sinaladamente as seguintes:

a) O Concello quedará obrigado a asumir ao seu cargo os aumentos que se produzan, no caso de que o custo das obras ou equipamentos resulte superior á valoración prevista no orzamento, ou ben se deriven de revisión dos presos adicionais, prórrogas e outros supostos.

b) Redactar e remitir o proxecto ou documento técnico e as súas especificacións, que deberán contar coa autorización e aprobación da Secretaría Xeral para o Deporte antes da firma do presente convenio.

c) As licenzas, autorizacións administrativas, contratación de servizos e subministracións, así como os impostos e taxas de aplicación aos pagos dos conceptos incluídos e previstos na execución do proxecto, serán por conta do Concello.

d) O Concello, quedará obrigado a facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das subvencións.

e) Deberán destinar os bens adquiridos ou sobre os que se realicen as obras ao fin concreto para o que se lle concedeu a subvención, por período non inferior a cinco anos, ao tratarse de bens inscritibles nun rexistro público.

O incumplimento da obriga de destino referida no parágrafo anterior será causa de reintegro nos termos establecidos ao efecto no artigo 37 da Lei 38/2007, do 7 de novembro, xeral de Subvencións, e no artigo 33 da Lei 9/2007, do 13 de xuño, de subvencións de Galicia, quedando o ben afecto ao pago do reintegro calquera que sexa o ser posuidor, salvo que resulte ser un terceiro protexido nos termos legalmente previstos.

f) No caso de que o beneficiario incumprise o establecido neste convenio, a Secretaría Xeral para o Deporte, poderá revogar a subvención concedida logo da audiencia do interesado.

3.- Será responsabilidade do concello a elaboración da documentación necesaria para dar cumprimento á normativa de seguridade e saúde, especialmente ao establecido na Lei 31/1995, do 8 de novembro, de prevención de riscos laborais (BOE núm. 269 do 10.11.1995) e no Real Decreto 1627/1997, do 24 de outubro, polo que se establecen disposicións mínimas de seguridade e saúde na obras de construcción (BOE núm. 256 do 25.10.1997). Prestarase especial atención no caso de que a actuación comprenda algún dos traballos que implican riscos especiais para a seguridade e a saúde dos traballadores, recollidos no anexo II do RD 1627/1997.

Así mesmo, é responsabilidade do concello a designación do coordinador de seguridade e saúde durante a execución da obra, no caso de que sexa necesario de acordo co establecido no artigo 3.2 do RD 1627/1997.



CONCELLO DE CABANAS

3.2.- Obrigas da Secretaría Xeral para o deporte.

A Secretaría Xeral para o deporte obrígase ao pagamento da achega indicada na cláusula segunda por importe de VINTE E CINCO MIL EUROS (25.000,00 €), con cargo á aplicación orzamentaria 04.40.441A.760.0 (código de proxecto 2013 00039).

Cuarta: BAIXAS DE ADXUDICACIÓN E INCIDENCIAS NA EXECUCIÓN

As achegas económicas comprometidas, veranse diminuídas en igual proporción que a que resulte de imputar as baixas que se obteñan nas respectivas adxudicacións. As baixas aplicaranse dende o primeiro momento, axustado a cantidade resultante a subvencionar.

Así mesmo a citada achega non experimentará incremento no caso de producirse incidencias ou aprobarse modificacións durante a execución da obra que supoñan aumento do seu custo.

Quinta: XUSTIFICACIÓN E PAGAMENTO DAS AXUDAS

De acordo co artigo 28.5 da Lei 9/2007 e co artigo 8 do Decreto 193/2011, o Concello estará obrigado a xustificar o cumprimento da finalidade da subvención á realización da actividade e o seu custo real mediante a presentación dunha conta xustificativa integrada con carácter xeral pola documentación que se relaciona no artigo 10 do Decreto 193/2011 e que incorporará en todo caso a certificación da intervención ou do órgano de teña atribuídas as facultades de control da toma de razón en contabilidade e do cumprimento da finalidade para a que foi concedida.

En todo caso, na xustificación deberá acreditarse o importe, procedencia e aplicación dos fondos propios, así como doutras subvencións ou recursos á actuación subvencionada.

O prazo para presentar esta xustificación será antes do 1 de novembro de 2017. Os pagos efectuaranse unha vez examinada e conformada a xustificación presentada polo concello.

Sexta: CONCORRENCEIA CON OUTRAS AXUDAS

As axudas contempladas neste convenio son compatibles con outras que poida acadar o concello, sempre que a suma de todas elas non supere o investimento total real.

Antes do primeiro pagamento, o concello achegará unha declaración do conxunto de tódalas solicitudes de subvención efectuadas, ou concedidas, para as obras obxecto deste convenio, diante das administracións públicas competentes ou doutros entes públicos.

No momento da xustificación da execución total do proxecto e, en calquera caso, antes do derradeiro pagamento, o Concello presentará unha declaración complementaria do conxunto das axudas solicitadas, tanto as aprobadas ou concedidas como das pendentes de resolución, para este proxecto, das distintas administracións públicas competentes ou das súas entidades vinculadas ou dependentes.

Sétima: PUBLICIDADE DAS NORMAS

No exterior da instalación ou do recinto, o Concello fixará un cartel informativo da natureza das obras obxecto de execución, con indicación expresa das administracións públicas que colaboran no seu financiamento.

O tratamento tipográfico identificativo de ambas entidades e dos seus logotipos ou anagramas será idéntico.

Oitava: REXISTROS PÚBLICOS DE AXUDAS

De acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos de axudas, subvencións e convenios e de sancións administrativas da Xunta de Galicia, o concello consinte expresamente a inclusión e publicidade dos datos relevantes referidos á subvención obxecto deste convenio nos rexistros públicos citados,



CONCELLO DE CABANAS

creados polos artigos 44 e 45 da Lei 7/2005, do 29 de decembro, do orzamentos xerais da Comunidade Autónoma de Galicia para o ano 2006. Así mesmo consinte na publicación do convenio que exixe a Lei 1/2016, do 18 de xaneiro, de transparencia e bo goberno no artigo 15 referido as obrigas específicas de información sobre os convenios.

Novena: COMPROBACIÓN E RECEPCIÓN DAS OBRAS

A Secretaría Xeral para o Deporte, poderá efectuar cantas comprobacións estime oportunas, con carácter previo á realización da proposta de calquera dos pagamentos parciais ou do final, incluíndo a comprobación da execución material do investimento que poderá realizar a través dun funcionario da Secretaría Xeral para o Deporte ou da persoa que designe.

A recepción da obras farase polo Concello de Cabanas, quen dará conta dela á Secretaría Xeral para o Deporte.

Décima: XESTIÓN, MANTENEMENTO E CONSERVACIÓN DAS INSTALACIÓNS.

A xestión, mantenemento e conservación da instalación deportiva, que terá como destino o uso ou servizo público de carácter deportivo, será responsabilidade exclusiva do concello, e serán de conta deste a totalidade dos gastos que xere. A asunción de tal responsabilidade producirase desde o día seguinte ao da realización a acta de recepción das obras, logo da oportuna comunicación da Secretaría Xeral para o Deporte.

Esta circunstancia non obviará a responsabilidade que á sociedade adxudicataria lle corresponda na policía e conservación das obras ata a recepción definitiva pola administración contratante.

O concello garante o uso gratuíto da instalación cando se precise para posibilitar a celebración de competicións deportivas oficiais organizadas ou promovidas pola Secretaría Xeral para o Deporte.

Así mesmo, comprométese a favorecer e facilitar a celebración de competicións deportivas de carácter oficial promovidas polas distintas federacións deportivas de Galicia. No caso de conflito ou discrepancia, a administración contratante da instalación, por solicitude dalgúnha das partes, poderá actuar como árbitro.

No suposto de que a xestión sexa encomendada a terceiros as obrigas anteriores deberán constar como carga no correspondente prego de bases.

Undécima: VIXENCIA E DENUNCIA DO CONTRATO

O período de vixencia do convenio comezará ao día seguinte da súa sinatura e estenderase ata o 31 de decembro do ano 2017, sen prexuízo da posibilidade de prorrogar dito período en virtude de causa debidamente xustificada.

A denuncia, que requirirá o acordo previo do órgano competente da administración que a pretenda, producirá afectos aos noventa (90) días da súa presentación diante da comisión á que se refire a cláusula décimo terceira, lo do da liquidación das obrigas pendentes de cumplir pola parte que a formule.

O incumprimento das cláusulas deste convenio será causa bastante para a súa denuncia.

Duodécima: COMISIÓN DE SEGUIMENTO E INTERPRETACIÓN

Para o seguimento e control de cumprimento deste convenio, e para a solución das dúvidas que a súa interpretación poida motivar, créase unha comisión integrada por dous representantes de cada unha das institucións asinantes.



Na comisión de seguimento e control informarase sobre os acordos de modificacións ou variacións que poidan producirse na execución do proxecto para a súa aprobación, conforme as limitacións da normativa vixente que sexa de aplicación. Cando estas impliquen modificación do orzamento, a Administración da Xunta de Galicia non asumirá compromisos económicos que impliquen incrementar a contía das anualidades establecidas na cláusula segunda.

En calquera caso, todas aquelas cuestión que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida, serán resoltas polo secretario xeral para o Deporte.

Décimo terceira: LEXISLACIÓN DE APLICACIÓN, NATUREZA DO CONVENIO E XURISDICIÓN COMPETENTE.

O réxime xurídico deste convenio ven determinado polo establecido no mesmo, na Lei 9/2007, do 13 de xuño, de subvencións de Galicia e na Lei 38/2003, do 17 de novembro, xeral de subvencións; O Decreto 11/2009, do 8 de xaneiro, polo que se aproba o regulamento que desenvolve a Lei 9/2007, do 13 de xuño, de subvencións de Galicia, e o Decreto 193/2011, do 6 de outubro, polo que se regulan as especialidades nas subvencións ás entidades locais galegas, a Lei 1/2016, do 18 de xaneiro, de transparencia e bo governo e demás normativa que sexa de aplicación.

Este convenio é de natureza administrativa e, consecuentemente, as cuestión litixiosas que xurdan na súa aplicación, interpretación e cumprimento serán competencia da xurisdición contencioso-administrativa.

Baixo os termos referidos e en proba de conformidade, asínase este convenio de cooperación en triplicado exemplar no lugar e data indicados.

A Secretaría Xeral para o Deporte, O Alcalde do Concello de Cabanas,
Marta Míguez Telle Germán Castrillón Permuy

3.-PROXECTO DEPURACIÓN E REDE DE SANEAMENTO NO LUGAR DE VALEDOSO (SANTA CRUZ DO SALTO). PROXECTO MODIFICADO TÉCNICO. Visto o acordo adoptado en sesión realizada o 25 de xaneiro de 2017 relativo a proposta Plan Provincial de Cooperación ás Obras e Servizos de competencia municipal (Plan Único de Concellos) “POS+2017”, en cuxo punto 2 relativo ao Plan Complementario do ano 2017, inclúese a obra “Depuración e rede de saneamento no lugar de Valedoso (Santa Cruz do Salto) cun orzamento de 104.215,56 euros.

Visto que nas xestións realizadas para obtención de permisos para instalación da rede de saneamento presentáronse problemas co trazado proposto, redactouse un modificado técnico do proxecto polo mesmo redactor en abril de 2017, co obxecto de facilitar a obtención dos terreos necesarios e sen variación do importe total, o cal foi ditaminado a favor pola Comisión de Asuntos do Pleno.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Mixto: o concelleiro do BNG Iago Varela Martínez manifesta que dos obxectivos do BNG é dotar de servizos públicos de saneamento ao 100% do territorio, inda que esta proposta vai nesa liña, denuncia que o goberno municipal trae a pleno medidas parciais e limitadas, non hai



un plan global para marcar tempos e ir dotando de abastecemento de auga e saneamento a tódolos lugares do Concello, con estas actuacións solo pretende publicitarse con notas de prensa e se pode ser con foto de conselleiros mellor, insiste na necesidade dun plan completo con tempos marcados para ir facendo segundo haxa cartos.

O Sr. Alcalde recórdalle que nunha comisión informativa trouxeron sete ou oito memorias, entre elas estaba a de Valedoso, considera que hai un plan, outra cousa é que non se dispoña de diñeiro para facer todo, ademais falouse de priorizar actuacións en núcleos rurais onde se faciliten os terreos.

Despois de debatido o asunto, o Pleno da Corporación en votación ordinaria, co voto a favor dos once membros que o compoñen, acorda:

Aprobar o proxecto modificado técnico de “Depuración e rede de saneamento no lugar de Valedoso (Santa Cruz do Salto)” redactado con data abril de 2017, quedando modificado o apartado 2 do acordo adoptado en data 25 de xaneiro de 2017, nos seguintes termos:

2.- Aprobar o Plan complementario do ano 2017 no que se inclúen os investimentos financeiramente sostibles que a continuación se indican e aprobar os correspondentes proxectos ou pregos de prescripcións técnicas:

| Denominación dos investimentos financeiramente sostibles (mínimo do 20% do total da achega e préstamo provincial asignado) | Orzamento |
|---|------------|
| Depuración e rede de saneamento no lugar de Valedoso (Santa Cruz do Salto). Proxecto modificado técnico. | 104.215,56 |
| TOTAIS | 104.215,56 |

4.- PROPOSTA CONCELLEIRO BNG SOBRE INVESTIMENTOS PARA CABANAS NOS ORZAMENTOS XERAIS DO ESTADO PARA 2017. Vista a proposta do concelleiro do BNG para que o concello de Cabanas inste ao goberno do Estado a inserir e garantir os investimentos necesarios para Cabanas nos orzamentos xerais do Estado para 2017, na cal alude a proposta de Orzamentos Xerais do Estado para 2017 que considera son unha discriminación sen precedentes para Galicia cunha minoración de 442 millóns de euros, consolidan o modelo neoliberal, con recortes e desigualdade social, esquecéndose dos nosos sectores produtivos como o mar, o agro ou a construcción naval, desaparecen os investimentos en I+D+i e retíranse achegas asignadas en partidas plurianuais, cando precisamente nos orzamentos se prevé un record de recadación Galicia vai recibir menos, e para Cabanas so se consignan 1300 euros para actuacións de reparación na estrada N-651.

Por elo propón ao Pleno do Concello de Cabanas a adopción dos seguintes acordos:

1. Instar ao Goberno do Estado a incluír e garantir os investimentos necesarios, habilitando as partidas correspondentes ou creando novas onde non se tiver contemplado, como mínimo nas seguintes actuacións para Cabanas e a súa área de influencia:

a). Adecuación completa da N-651 para a mellora da seguridade viaria na estra ao seu paso por Cabanas.



CONCELLO DE CABANAS

- b). Compensación da gratuidade dos movementos na autoestrada AP-9 nos tramos Fene-Cabanas e Cabanas-Miño.
- c). Implantación e mellora de servizos ferroviarios de proximidade:
- Plan para a implantación de servizos de ferroviarios de proximidade para as comarcas de Ferrolterra, Eume e Ortegal.
 - Modernización do tramo do Eixo Atlántico Ferrol-A Coruña.
 - Construcción de by-pass de Infesta-Betanzos.
2. Instar ao Parlamento de Galicia a que realice unha declaración institucional na que se solicite ao Goberno do Estado o aumento das partidas orzamentarias e investimentos para o conxunto de Galicia nos orzamentos xerais do Estado para 2017.
3. Trasladar os presentes acordos ao presidente da Xunta de Galicia e ao Goberno do Estado.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira manifesta que o grupo socialista no Congreso presentou emendas a estes orzamentos, que é a vía correcta para facelo, inda que non está mal recordar as necesidades do Concello en concreto e da Comarca en xeral, calquera das propostas que se contemplan aquí están feitas desde o grupo socialista no Congreso, o Plan Ferrol en Cabanas non é o sector principal pero hai unha parte que vive dese sector, parécelle ben pedir máis investimentos, mellora da N-651, recuperación autonómica da AP-9, etc., votarán a favor.

Polo grupo Mixto: a concelleira de AEC María Eva García Amor non sabe as posibles modificacións que se poidan facer no Parlamento, nin si se pode garantir que vaian ser aprobadas, inda que os investimentos do Goberno en Galicia podían ser mellores, polo que se vai abster.

Polo grupo Popular: o voceiro Manuel González López considera esta moción como un populismo, estase a falar duns orzamentos que inda non se debateron no Parlamento e polo tanto non están aprobados, pregunta de onde saca os datos de recortes de Seguridade Social, pois na proposta de orzamentos presentada hai incremento en servizos sociais e sanidade, investimentos na liña ferroviaria Ferrol-Coruña e consignación para mellora seguridade vial na N-651 en Cabanas, recorda que o concelleiro do BNG se abstivo no pleno de agosto cando se tratou o proxecto de melloras, gustaríalle que fose máis coherente nas súas decisións.

O concelleiro do BNG Iago Varela Martínez agradece o apoio do voceiro socialista e está de acordo en que se podían incluir máis cuestións, pero centrou a proposta en investimentos neste Concello, reclama do voceiro popular a lectura da proposta de orzamentos e indica que por non estar aprobados é o que permite facer proposta de modificación, só hai 1.300 euros ligados a este Concello, e con esta proposta parécelle lamentable que poida haber concelleiro neste pleno que vote en contra ou se absteña, porque sería estar en contra da mellora da N-651, servizos ferroviarios, compensación peaxe Fene-Cabanas e Cabanas-Miño, etc., pide que reflexionen.

O concelleiro de PDDdG Xosé Manuel Pérez Sardiña sinala que todo o que sexan melloras para o Concello dálle para adiante sen discutir si é populismo ou non, amañen os problemas do seu partido en Madrid antes de vir aquí a dar leccións.

O Sr. González López pregunta si os 1.300 euros que indicou o concelleiro do BNG non lle faltarán algúns ceros, hai unha partida de 1.300.000 euros nos orzamentos xerais e intentaran que se execute nesta anualidade como está previsto no BOE do 31-12-2014 onde estaban presupostadas



CONCELLO DE CABANAS

tres anualidades, a 2^a de 2 millóns e a 3^a de tres millóns, por iso rexeitaron a proposta na Comisión de Asuntos do Pleno.

O Sr. Alcalde aclara que non vai defender a ningún corrupto, pero o concelleiro de PDDdG é o menos indicado para falar e alude a que cando gobernaron na Xunta tiveron un conselleiro que tivo que dimitir por corrupción.

A continuación somete a votación o ditame da Comisión informativa de Asuntos do Pleno de rexeitar esta proposta, resultando cinco votos a favor dos membros do grupo Popular, cinco en contra dos membros do grupo Socialista, concelleiro do BNG e concelleiro de PDDdG, e unha abstención da concelleiro de AEC. Producíndose empate e de conformidade co artigo 46.2.d) da Lei 7/1985, do 2 de abril, repítese a votación, obtendo o mesmo resultado, a vista do cal decide o voto a favor do Presidente, quedando aprobado o ditame e rexeitada dita proposta.

5.- INICIATIVA GRUPO SOCIALISTA PARA HABILITAR PRAIA CANINA. A continuación dáse conta da iniciativa do grupo Socialista para a habilitar unha praia canina en Cabanas, en cuxa exposición de motivos alude as praias existentes no Concello con gran afluencia de usuarios, e que Cabanas conta desde 12-1-2012 cunha ordenanza municipal para a protección e tenza de animais que no artigo 6.2.a) e b) establece prohibicións de animais nas praias do Concello, por elo considerando que o turismo é un dos máximos atractivos do concello de Cabanas e que a tenza e viaxe con animais de compañía é cada vez más habitual, consideran que contar cunha praia para estes animais potenciaría o turismo, ademais o Concello ten competencia para organizar os usos dos espazos de costa e praias, polo exposto propoñen ao Pleno o seguinte acordo:

Que se inicien os trámites necesarios para dotar a Cabanas dunha “praias canina” para uso e disfrute durante todo o ano por parte dos propietarios de animais de compañía.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Popular: o voceiro Manuel González López reitera que na Comisión de Asuntos do Pleno quedaron solicitar a Costas coa delimitación na zona do espigón, cunha pequena memoria xustificando a necesidade da praia canina para obter a autorización e utilizar dita praia.

Polo grupo Mixto: o concelleiro do BNG Iago Varela Martínez considera interesante a proposta para a veciñanza de Cabanas e para os visitantes, a proposta inicial da praia do Areal tiña vantaxes pois quedaría segregada e non sería parte dunha praia maior, é unha proposta positiva e votará a favor.

A concelleira de AEC María Eva García Amor parécelle ben habilitar un lugar para disfrute dos usuarios da praia que teñan mascotas, xa no programa de AEC levaban algo parecido de habilitar unha zona para que os donos puideran disfrutar destes animais.

O concelleiro de PDDdG Xosé Manuel Pérez Sardiña recorda que tamén suxeriu que a praia do Fabal non ten analíticas que garantan o baño, non é unha zona habilitada para baño; en canto ao manifestado polo voceiro do grupo popular indica que o da praia da Madalena era como última opción, considera que o areal máis adecuado sería Rio Castro, sería tanto para as persoas que veñen n o verán como para as que están todo o ano., en principio votará a favor, logo a xestión é cousa do goberno.

Polo grupo Socialista: o voceiro Delfín Feal Pereira indica que presentaron unha moción cunha praia concreta, logo na Comisión de Asuntos do Pleno presentáronse unha serie de



CONCELLO DE CABANAS

inconvenientes, marisqueo, calidade das augas, camiño inglés, etc., e xurdiron outras situacións, sorpréndelle que agora se diga que ten que ser o espigón, quedouse nunha serie de peticións, Chamoso, O Cantiño, espigón, Areal, etc., espera que non se considere solo a zona do espigón senón que se faga un estudio amplio e se inicien os trámites para unha praia canina, logo reunir a xunta de voceiros e ver o punto concreto para trasladalo a unha ordenanza.

O Sr. Alcalde considera que está explicado na Comisión de Asuntos do Pleno, a mellor opción parecía a zona do espigón, pero se queren que se pida outros sitios hai que facer un plano e esperar a contestación de Costas, tiña pensado comezar unha memoria con planos da zona e non ten inconveniente no estudio doutras zonas.

O Sr. Feal Pereira insiste no estudio de máis zonas, e insiste na sorpresa de que se restrinxira a unha zona concreta, e o Sr. Alcalde aclara que houbo unha serie de inconvenientes á proposta inicial do grupo socialista e quedouse en estudar varias opcións.

A Sra. García Amor pregunta si ten que ser praia, porque pode haber outras localizacións, e o Sr. Feal Pereira manifesta que se trata dunha praia, outras cousas poden ser a maiores.

Despois de debatido o asunto, o Pleno da Corporación en votación ordinaria, con nove votos a favor dos membros dos grupos Popular, Socialista e concelleiro do BNG, e dúas abstencións, da concelleira de AEC e concelleiro de PDDdG, acorda aprobar a referida iniciativa.

PARTE DE CONTROL ÓRGANOS DA CORPORACIÓN.

6.- INFORMES DA PRESIDENCIA.

A) Resolucións da Alcaldía. Dáse conta das resolucións ditadas desde a número 156 do 24-03-2017 ata a número 205 do 21-094-2017.

B) Liquidación orzamento 2016. No cumprimento do establecido no artigo 193.4 do Texto Refundido da Lei Reguladora das Facendas Locais, aprobado por Real Decreto Lexislativo 2/2004, do 5 de marzo, dáse conta da seguinte resolución da Alcaldía pola que se aproba a liquidación do orzamento do exercicio 2016:

“RESOLUCIÓN. Liquidación orzamento 2016.

Visto o expediente de Liquidación do orzamento do exercicio de 2016, o cal se tramita con data superior ao 1 de marzo por problemas da aplicación informática de contabilidade da Deputación Provincial que se está a utilizar neste Concello.

Visto os documentos contables que a xustifican, e os informes de Intervención sobre avaliación do cumprimento do obxectivo de estabilidade orzamentaria, regra de gasto e límite da débeda e sobre a propia liquidación.

De conformidade co disposto no artigo 191.3 do Texto refundido da lei reguladora das Facendas Locais, aprobado por Real Decreto Lexislativo 2/2004 do 5 de marzo, e artigo 90.1 do Real Decreto 500/1990, do 20 de abril, sobre materia orzamentaria, RESOLVO:

Primeiro.- Prestar aprobación a Liquidación do orzamento deste Concello correspondente ao exercicio de 2016, formulada pola Intervención segundo o establecido no artigo 191 do Texto refundido da lei reguladora das Facendas Locais e artigo 90 do Real Decreto 500/1990.

a) O expediente consta da seguinte documentación:

- Estados numéricos da Liquidación do orzamento de gastos e ingresos 2016
- Resultado orzamentario do exercicio 2016



**CONCELLO
DE
CABANAS**

- Anexos: Relación de acreedores.
- Relación de debedores
- Remanente de Tesourería
- Acta de arqueo
- Liquidación exercicios pechados
- Movemento non orzamentarios de tesourería.

- Informes de Intervención.

b) Resultado orzamentario do exercicio de 2016 deducido da aplicación informática:

| Concepto | Dereitos recoñecidos netos | Obrigas recoñecidas netas | Axustes | Resultado orzamentario |
|---|----------------------------|---------------------------|------------|------------------------|
| a. Operacións correntes | 2.735.438,96 | 2.354.927,45 | | 380.511,51 |
| b. Operacións de capital | 449.976,86 | 803.184,87 | | -353.208,01 |
| 1. Total operacións non financeiras (a+b) | 3.185.415,82 | 3.158.112,32 | | 27.303,50 |
| c) Activos financeiros | 0,00 | 0,00 | | |
| d) Pasivos financeiros | 327.922,76 | 51.678,47 | | 276.244,29 |
| 2. Total operacións financeiras (c+d) | 327.922,76 | 51.678,47 | | 276.244,29 |
| RESULTADO ORZAMENTARIO DO EXERCICIO I=1+2 | 3.513.338,58 | 3.209.790,79 | | 303.547,79 |
| AXUSTES | | | | |
| 3. Créditos gastados financiados con remanente de tesourería para gastos xerais | | | 384,00 | |
| 4. Desviacións de financiamento negativas do exercicio | | | 66.925,15 | |
| 5. Desviacións de financiamento positivas do exercicio | | | 121.826,96 | |
| II TOTAL AXUSTES (II=3+4-5) | | | -54.517,81 | |
| RESULTADO ORZAMENTARIO AXUSTADO (I+II) | | | | 249.029,98 |

c) Remanente de Tesourería do exercicio 2016

| Concepto | Importes ano | Importes ano anterior |
|--|--------------|-----------------------|
| 1. (+) Fondos líquidos | 994.758,44 | 557.792,66 |
| 2. (+) Dereitos pendentes de cobro (total) | 442.193,37 | 494.121,68 |
| - (+) do orzamento corrente | 384.887,38 | 362.303,51 |
| - (+) de orzamentos pechados | 57.305,99 | 131.818,17 |
| - (+) de operacións non orzamentarias | 0,00 | 0,00 |
| 3. (+) Obrigacións pendentes de pago | 370.511,60 | 274.876,65 |
| - (+) do orzamento corrente | 273.954,94 | 180.905,13 |
| - (+) de orzamentos pechados | 7.633,06 | 7.633,06 |
| - (+) de operacións non orzamentarias | 88.923,60 | 86.338,46 |
| 4. Partidas pendentes de aplicación | | |



CONCELLO
DE
CABANAS

| | | |
|---|--------------|------------|
| -(-) cobros realizados pendentes de aplicación definitiva | 0,00 | 0,00 |
| -(+) pagos realizados pendentes de aplicación definitiva | 0,00 | 0,00 |
| I. Remanente de tesourería total (1+2-3+4) | 1.066.440,21 | 777.037,69 |
| II. Saldos de dubidoso cobro | 57.305,99 | 101.767,80 |
| III. Exceso de financiamento afectado | 120.664,82 | 0,00 |
| IV. Remanente de tesourería para gastos xerais | 888.469,40 | 675.269,89 |

Segundo.- En base aos datos obtidos sobre a cualificación de Remanentes de 2016, en aplicación do principio de prudencia e normas de aplicación orzamentaria, parte do Remanente de Tesourería para gastos xerais está afectado ao financiamento de actuacións previstas e que non foron executadas no exercicio anterior polo que seguidamente se detallan as reservas que se expresan polos importes que se indican:

| | |
|---|------------|
| REMANENTE DE TESOURERÍA PARA GASTOS XERAIS | 888.469,40 |
| Reservas. | |
| 1) Ingresos pendentes devolución recoñecidos a 31 de decembro de 2016 | 0,00 |
| 2) Financiamento para incorporación de remanentes de incorporación obligatoria. | 625.855,47 |
| Suma reservas (1+2). | 625.855,47 |
| V. REMANENTE DISPONÍBLE = Remanente gastos xerais- Reservas | 262.613,93 |

O importe do superávit orzamentario por operacións non financeiras será xestionado de conformidade co establecido no artigo 32 e na Disposición Adicional Sexta da Lei orgánica 2/2012, do 27 de abril, de Estabilidade Orzamentaria e Sustentabilidade Financeira, na redacción dada a estes preceptos pola Lei orgánica 9/2013, do 20 de decembro, de control da débeda comercial no Sector Público, en aplicación do establecido na Disposición Adicional Novena (“*Destino do superávit das entidades locais correspondente a 2014*”) do Real Decreto Lei 17/2014, do 26 de decembro, de medidas de sustentabilidade financeira das Comunidades Autónomas e Entidades Locais e outras de carácter económico. Para tal fin deberá terse en conta o establecido na Disposición Adicional Décimo sexta do Texto refundido da lei reguladora das Facendas Locais, na redacción dada a este precepto pola Disposición Adicional Primeira do Real Decreto Lei 2/2014, do 21 de febreiro (‘*Investimento Financeiramente Sostible*’).

A contía resultante para finanziar novos gastos poderá incrementarse cos importes que non resulten necesarios para os gastos reservados nos apartados 1, e 2 anteriormente citados.

Terceiro.- Dar conta da Liquidación do orzamento de 2016 ó Pleno da Corporación na primeira sesión que realice, así como, remitir copia da Liquidación aprobada á Administración do Estado e á Comunidade Autónoma de Galicia.

O acorda e asina o Sr. Alcalde Germán Castrillón Permuy, en Cabanas a dez de abril de dous mil dezasete, do que eu, Antonio López Vila, como Secretario, dou fe.

Documento asinado electronicamente.”

C) Informe intervención liquidación 2016. Dáse conta do informe de Intervención sobre a liquidación de 2016 en relación coa estabilidade orzamentaria, regra de gasto e límite da débeda, remitido ao Ministerio de Facenda e Administracións Públicas, Secretaría Xeral de Coordinación Autonómica e Local, en cumprimento das normas establecidas ao efecto.



D) Informe sobre orzamento 2017. Dáse conta da comunicación do informe de Intervención sobre o orzamento de 2017 en relación coa estabilidade orzamentaria, regra de gasto e límite da débeda, remitido ao Ministerio de Facenda e Administracións Públicas, Secretaría Xeral de Coordinación Autonómica e Local, en cumprimento das normas establecidas ao efecto.

E) Informe sobre a execución trimestral 1ºT/2017. Dáse conta da comunicación dos datos de execución do orzamento no 1ºT de 2017 remitida ao Ministerio de Facenda e Administracións Públicas, Secretaría Xeral de Coordinación Autonómica e Local, en cumprimento das normas establecidas ao efecto.

MOCIÓN DE URXENCIA.

A) O concelleiro de PDDdG Xosé Manuel Pérez Sardiña manifesta que á vista da non inclusión da declaración institucional polo eixo ferroviario Ferrol-Coruña despois de haber quedado que se trataría neste pleno, considera que se trata de asunto urxente e debe tratarse para adherirse a esta declaración.

Sometida a votación a ratificación da urxencia, o Pleno da Corporación en votación ordinaria co voto a favor de tódolos membros, acorda ratificar a urxencia e a inclusión na Orde do Día

A continuación o Sr.Perez Sardiña da lectura a seguinte declaración institucional:

“Declaración Institucional polo “Eixo Ferroviario Ferrol -A Coruña”. O camiño de ferro que enlaza Ferrol coa cidade da Coruña data de 1913. Desde entón, nesta liña non se acometeron as melloras imprescindibles para favorecer o asentamento demográfico, o desenvolvemento industrial e apostar polo tren como un medio de transporte público, eficiente e práctico para o transporte de persoas e mercadorías.

Goberno tras goberno, e mandato tras mandato, a conexión ferroviaria entre estas dúas urbes do Eixo Atlántico no Norte foi a gran esquecida en todos os plans de inversións e infraestruturas, no que supón un desprezo sistemática a esta comarca e aos seus veciños, aos que nos temos a obriga de representar e defender.

Reunidos no Concello de Ferrol, na tarde do luns 20 de marzo de 2017, e apoiados na declaración unánime do Parlamento de Galicia, vimos de acordar:

A curto prazo:

- Demandar con urxencia un incremento de frecuencias que compatibilice os servizos ferroviarios coa vida laboral e estudantil da veciñanza das nosas comarcas.
- A mellora das estacións intermedias facilitando o acceso e accesibilidade, así como a combinación axeitada cos servizos ferroviarios de FEVE e co transporte público en autobús.

-Un plan de fomento intensivo do seu uso, con bonificacións que poidan facer atractivo o servizo, e competitivo respecto aos elevados prezos das peaxes da AP9 e do servizo público por estrada.

– A inclusión da liña ferroviaria no Plan de Transporte Metropolitano, que permita, como quedou dito no punto anterior, acollerse a bonificacións para maiores, estudiantes, menores de 18 anos, desempregados, etc.

– Melloras puntuais da infraestrutura, como a eliminación do bypass de Betanzos ou a mellora de puntos concretos do trazado que permitan reducir os tempos da viaxe.



A medio prazo:

– A adecuación da liña a un tren de proximidade digno, cunha infraestrutura que non deixe a comarca fóra do Eixo Atlántico, combinando os servizos directos con servizos con paradas intermedias, ferrocarril que xa estivo no Convenio da Xunta co Ministerio de Fomento no ano 2000 e que suporía un investimento, co IPC e IVE actualizados duns 500 millóns de euros e un traxecto sen paradas de 25 minutos entre as dúas localidades.

Esta demanda, no urgente, vén amparada por unha masa crítica da que formamos parte os alcaldes dos Concellos polos que cruza a liña, a declaración unánime da Cámara galega e os deputados e senadores que representan a nosa comarca e que farán resoar esta demanda no Congreso e no Senado, ante a conselleira de Infraestruturas da Xunta, Ethel Vázquez, e o Ministro de Fomento, Íñigo de la Senra.

Asemade, solicitaremos unha comparecencia ante a Comisión de Fomento do Congreso e do Senado coa lexitimidade que nos da ser os representantes de medio millón de veciños, para expoñer, directamente, estas demandas”.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Mixto: o concelleiro do BNG Iago Varela Martínez pensa que esta proposta vai na liña da pregunta que fixo no pleno de marzo pola ausencia do alcalde a dita xuntanza, queda a espera de ver o que fai o PP á vista da iniciativa, nos orzamentos do Estado votaron en contra de pedir investimentos para esta liña e mellora do servizo na comarca.

Polo grupo Popular: o Sr. Alcalde manifesta que están a favor pero os que os que organizan este tema debían saber por onde pasa a liña do ferrocarril e invitar a tódolos concellos, Mugardos e Cabanas quedaron sen invitar, por iso non asistiu, espera que o fagan na próxima convocatoria.

O concelleiro de PDDdG Xosé Manuel Pérez Sardiña opina que é necesario unha proposta concreta de mostrar o apoio a esta declaración institucional; tamén recorda ao Sr. Alcalde que este pleno ten pendente unha moción nesa liña desde hai un ano, vostedes comprometeronse a ir a Mancomunidade e tratar o tema alí, agora quedan descolgados e non sabe quen ten a culpa.

O Sr. Alcalde aclara que se falou na Mancomunidade disto, paralelamente alguén convocou esa xuntanza e o concello de Cabanas non vai onde non está invitado, están de acordo coa declaración e no relativo a moción de hai un ano tamén se quedou que vostede fora cara o outro lado, Miño, Paderne, etc. e negouse totalmente.

O Pleno da Corporación en votación ordinaria, co voto a favor dos once membros que o componen, acorda adherirse a dita declaración institucional.

07. ROGOS E PREGUNTAS.

a) Preguntas orais.

a.1. Intervención do concelleiro do BNG Iago Varela Martínez.

a.1.1. Sobre o tema da praga da pataca polo que sabemos as persoas produtoras rexistradas na oficina agraria non recibiron notificación ao respecto, nin saben cando van ter que recoller as patacas, podería o Alcalde dicir cal é a situación actual do concello e cal é a previsión que hai?.

Resposta Alcalde: dicimos o que sabemos, agora mesmo estase entregando sacos para coller a pataca da semente e despois seguirase co calendario segundo nos vaian dicindo desde a Xunta.



CONCELLO DE CABANAS

a.1.2. No pleno anterior preguntei polos problemas do alumado público en Chao da Aldea e durante as últimas semanas volvérónse a producir cortes durante varias noites na mesma zona, tamén na zona de Batán e outros lugares do concello, non sei si podería dar unha explicación a estes problemas?

Resposta Alcalde: son problemas que xorden co temporal, creo que en Frayan están solucionados e en Val solucionouse hoxe porque había corte dun cable.

A concelleira delegada de servizos María Eva García Amor indica que o de Val se foi a substituír, en Chao da Aldea a empresa comentou que estaba amañado pero si volve a fallar hai que tratar de amañalo definitivamente.

a.1.3. Rogo. Este temporal causou estragos no tellado dunha vivenda deshabitada no Campo do Oito, hai varias tellas caídas e outras en situación precaria, roga tomen medidas de seguridade oportunos, non sei exactamente o número, é na parte de atrás onde está o cruceiro.

a.1.4. Rogo. A veciñanza das Modias denuncia que con asiduidade pasan vehículos a velocidade e solicitan a instalación de bandas redutoras, roga considere esta proposta si é posible asumilo ou facer algo semellante para garantir a seguridade da xente dessa zona.

Resposta Alcalde: non temos inconveniente e poñelas pero os de esa casa van a durmir pouco si pasan os coches de noite por alí, os veciños que queiran iso que se acrediten e digan onde queren que se poñan, pedirase informe a policía local.

a.2. Intervención do concelleiro de PDDdG Xosé Manuel Pérez Sardiña.

a.2.1. Xa soubo o Alcalde que pasou coa obra OrangeSpain advertida pola Demarcación de Estradas, en marzo lle preguntamos e non sabía de que era?

Resposta Alcalde: hai que se máis claros sobre a pregunta, referiríase a conexión que se fixo no centro de saúde.

a.2.2. Que medidas van adoptar sobre os problemas de saneamento que advertimos no camiño vello do Areal?

Resposta Alcalde: o camiño vello, a travesía do Oito, hai un informe de Viaqua onde recolle que o saneamento xeral está ben.

A concelleira delegada de Servizos María Eva García Amor manifesta que foi a velo cando se facía o informe, foron con cámaras e hai un video do informe que está a súa disposición.

a.2.3. O hórreo de Moncho de Cardeita catalogado no ano 1976, foi derrubado nas obras dos chalets da sociedade IslaMouron, pode explicar o Alcalde como protexe o patrimonio etnográfico e en consecuencia se o Concello abriu expediente sobre este derribo?

Resposta Alcalde: hai un informe do arquitecto municipal sobre iso.

a.2.4. Porque non actuou cando os veciños lle reclamaron a protección da fonte do carballiño no lugar de Anido que foi afectada polas rozas da Corporación Caixa Galicia?

Resposta Alcalde: non lle pode contestar porque non actuaron, non sabe do asunto.

a.2.5. Suxestión. A casa do pino do Areal está nun estado ruinoso e veciños da zona advirtieron do perigo de caída de balcóns e de beirado sobre a beirarrúa que é unha das más transitadas de Cabanas, suxerímos que informe aos servizos técnicos municipais sobre o estado desta casa e se coloquen en prevención puntais de aceiro e que fagan o mesmo coa casa de Xan Ares.

a.2.6. Suxestión. No cruce do camiño das Cavadas coa N-651 hai un anaco sen amañar que



está en terra rodeado por beirarrúa e un camiño, por aí pasan augas pluviais que son recollidas polo Concello, foi rozado pero tamén hai losetas despegadas, suixeremos que se amane para o seu tránsito ese espazo de terra e se repoñan as losetas despegadas máis arriba.

Resposta Alcalde: as losetas é competencia do Concello e se pode facer, pero o terreo é tema da Demarcación de Estradas, no proxecto de humanización recóllese que aí se vai facer unha actuación, o concello non pode actuar aí de inmediato.

a.2.7. Suxestión. Vemos ano tras ano que nas beirarrúas de Cardeita a Chao da Aldea hai bouzada que se mete na beirarrúa e que estorba o paso de peóns, suixerimos que sexan máis céleres a hora de realizar a súa roza.

Resposta Alcalde: hai que revisar, pero que saiba está toda limpia.

b) Preguntas por escrito.

b.1. Preguntas presentadas polo concelleiro do BNG Iago Varela Martínez en escrito de data 24 de abril de 2017.

b.1.1. O último temporal de vento deixou unha serie de estragos por todo o concello, que foron solucionándose con más ou menos celeridade. Porén, especialmente graves foron os danos no Piñeiral da Madalena, onde caeron moitos piñeiro e outros quedaron en situación precaria.

Estes acontecementos poñen en evidencia dúas cuestiós:

- As sucesivas talas de árbores no piñeiral levadas a cabo polo goberno municipal nos últimos anos están a aumentar a desprotección do mesmo, facendo que sexa moito máis vulnerábel ás inclemencias do tempo.

- O Piñeiral de Cabanas e as súas inmediacións (paseo marítimo, estrada...) non son un lugar seguro cando hai alerta de temporal de choiva ou vento, como denunciamos recentemente desde o BNG.

Ante esta situación, desde o BNG desexamos ter resposta ás seguintes cuestiós.

- Cuantificou o goberno municipal os danos producidos polo último temporal de vento no Piñeiral de Cabanas? Cales foron?

- Cal vai ser o destino da madeira das árbores caídas?
- Vai executar esta actuación algunha empresa externa?
- En caso afirmativo, que empresa levará a cabo estes traballos? Vaille supór desembolso de cartos ao Concello?
- Cales son as actuacións inmediatas que ten previsto levar a cabo o Concello no Piñeiral para a mellora do entorno?
- Ten previsto o Concello algunha actuación a medio ou longo prazo para que este entorno recupere o seu esplendor?

Resposta Alcalde:

- Non é certo o que vostede está afirmando, nesta ocasión caeron piñeiro onde máis había.
- En canto ao perigo, cando hai temporal, por cerca das árbores, dos paseos, todos son perigosos, a miña suxestión neste sentido é que debería ser vostede máis positivo.
- Claro que está valorado, fíxose unha memoria pola aparelladora do Concello onde se recolle tódolos piñeiro que están caídos e os danos que houbo.
- Vaise proceder a retirada invitando a varias empresas para a realización dos traballos.



CONCELLO DE CABANAS

- En canto ao custo non se sabe, adxudicarase a mellor oferta, espera que non supoña desembolso para o concello.

- Hai pedida unha subvención a través de Seitura 22 e está previsto, despois de que se retire a madeira, facer plantacións e limpeza cara a primavera e verán.

- En canto a actuacións xa estamos traballando, xa lle acabo de dicir que hai solicitada subvención a Seitura 22, estase intentando facer nova plantación como se fixo hai vinte días, onde por certo que xa roubaron plantas., o plan é traballar de forma continuada.

b.2. Preguntas presentadas polo concelleiro de PDDdG Xosé Manuel Pérez Sardiña en escrito de data 25 de abril de 2017.

b.2.1. O pasado 23 de abril o Concello foi convocado a unhxuntanza en Abegondo para tratar os asuntos relativos a nova taxaásliñas eléctricas e IBI da AP-9, preguntamos por este asunto na Comisión pero non había información áinda. Pódenos explicar o goberno local que se tratounesaxuntanza e cales son as principaisconclusóns e propostas de actuación?

Resposta Alcalde: presentouse un informe xurídico de avogado especialista en dereito tributario local para a recuperación do IBI de autoestradas e empezar a traballar sobre as ordenanzas gasísticas e eléctricas, quedaron en pasar máis información en quince días, recoméndase que en concellos pequenos con poucos medios, facer agrupación de concellos para intentar ir xuntos como se intentou no seu día no ano 2008-2009 cando estaban coa Deputación da Coruña traballando nestes asuntos, estamos a espera de que manden máis información.

b.2.2. O Tribunal Superior de Xustiza de Galicia requireinforme sobre finalizaciónde obras de demolicióne reconstruccióno procedementoordinario 4126/1994.Informou o alcalde da situación en que se atopa a demolición e reconstrución? Que lleexplicouao Tribunal?

Resposta Alcalde: si que se mandou informe das obras realizadas e certificadas ata a data.

b.2.3. Realizouseunha actuación de reposición de céspede natural no campo municipal de fútbol da Veiga. Quen se fai cargo desta actuación? Pódenos concretar a canto ascende a reposición de céspede e a quen se lleadxudicou?

Resposta Alcalde: pois o contrato de mantemento que había, o céspede se fixo con ese contrato, o campo de fútbol é municipal,

- Quen fixo ese cambio de céspede?

Resposta Alcalde: no orzamento de 2016 fixose un contrato de mantemento da área deportivo e recreativa da Veiga, con ese contrato se faría iso.

b.2.4. Polo que imos comprobando o goberno local segue ignorando empresas locais en contratacións menores. Poderíanos explicar os criterios para contratar obras menores do Partido Popular?

Resposta Alcalde: tódalas empresas inscritas son invitadas se as obras son da súa actividade, non se contrata ningunha obra do partido, hai un proceso administrativo para contratar.

As preguntas número 5 e 6 do escrito que se recollen a continuación non foron tratadas.

5. O pasado 23 de marzo de 2017 o concelloremitiu o PXOM para conformidade da Dirección Xeral de Conservación da Natureza, non obstante inda non se nos respondeu en Pleno sobre a prorroga do contrato para a redacción. Quenfixo os traballos de actualización?Houbo contestación da Dirección Xeral de Conservación da Natureza?

6. Sobre o proxecto de mellora vial da N-651, xa non humanización. Que



novedades houboneste pasado mes? Cando remitiu a alcaldía as alegacións, o informe técnico municipal e a exposición pública?

b.2.7. Seguen con asesorías externas e de fóra do concello para contratar a xestión das tics, web, redes sociais, planificación soporte informático. En canto se adxudicou o contrato negociado sen publicidade? A alcaldía vai seguir incumprindo a lei de transparencia e os acordos da corporación na xestión da web?

Resposta Alcalde: pola miña parte non teño inconveniente en contratar unha persoa fixa, pero como vostede sabe na RPT non está recollido e non se pode facer contratación de persoal, estase traballando co proceso de transparencia e os medios son limitados, adxudicouse por 11.540 euros desde o 1 de abril.

b.2.8. Chégannos queixas por falta de alumeadoo na zona do Areal, a partir do camiño das Cavadas para arriba apáganse as farolas. Teñen coñecemento da situación? Que medidas concretas van adoptar?

Resposta Alcalde: avisar a empresa de mantemento, estase revisando o alumado para resolver os inconvenientes.

b.2.9. Sobre a contratación e xestións sobre a segunda fase do Penso. Adxudicou o goberno local a execución do proxecto ilegal? A que empresa? A que contía ascende? Fixo algúnhaxuntanza cos veciños afectados e que avances houbo?

Resposta Alcalde: non sei a que proxecto se refire vostede, o Concello non contrata proxectos ilegais, a non ser que se refira a algún proxecto da época que estivo vostede aquí gobernando en coalición, inda non se adxudicou a 2ª fase, estase a espera de poder adxudicalo, si tivemos reunión e estase en intercambio de pareceres.

b.2.10. Sobre a praga da pataca e a partir da pregunta que llefixemos no último pleno. O goberno local ten información sobre o sistema de recollida? Informouno a Xunta en que situación se atopa a praga no noso concello? Informou a Xunta ao Concello cantos patacaishai afectados en Cabanas?

Resposta Alcalde: esta pregunta xa contestou, a 1ª fase recollida da pataca de semente e se empezará a entregar os sacos habilitados para esa recollida, colocaron varias trampas e estamos esperando saber o resultado do estudio desas trampas, cando faciliten máis datos non temos inconveniente en díilos, somos meros informadores.

b.2.11. A Demarcación de Estradas do Estado solicito informe da policía local efotografías sobre vertedura en Vilar do Colo. Que medidas adoptou o concello en relación a esta comunicación da Demarcación?

Resposta Alcalde: as medidas do Concello xa foron tomadas antes de que Fomento pedira este informe da policía local, habíase enviado a Fomento informe da policía local dicíndolles que tiñan que limpar esa parcela no Polígono de Vilar do Colo, a Demarcación de Estradas da Coruña pediu novamente ese informe para verificar que o era o que pedía, están reparando e limpando esa parcela.

b.2.12. A deterioración do piñeiral da Madalena é evidente e vense agravando cogoberno do Partido Popular nos últimos anos, segundo o alcalde coas súas actuaciónsía quedar bonito. Ben bonito que está a quedar, xa se ve. Aos piñeiro centenarios e en perfectas condicións cortados con escusas sen fundamento agora súmanse os caídos ou deitados polo último temporal. O goberno local pode concretar cantos piñeiro scaeron no último temporal? Cantos piñeiro quedaron deitados



CONCELLO
DE
CABANAS

sobre outros? Sabe xa cuntos piñeiroforon eliminados arbitrariamente do piñeiral polo concello e polos temporais anteriores? Que medidas vai adoptar o concello para previr a eiruga procesionaria e as motoserras?

Resposta Alcalde: non creo que sexamos culpables dos temporais, hai sobre 30 piñeiro caídos, 7 ou 8 con dificultades de estabilidade, logo hai un proxecto de Seitura 22 que estamos intentando sexa subvencionado para reparación e mantemento do piñeiral, así como proxecto de plantación, seguiremos traballando para que o piñeiral sega estando bonito, co temporal caeron na zona onde máis había, vamos intentar arranxalo todo o máis axiña posible.

b.2.13. Suxestión. A autopista de peaxe AP9 que pasa polo nosoconcello, segundo información do propio goberno local, ten que pagar un 5% de contribución de bens especiais. Non obstante, revisando os bens catastrais atopamos en consulta pública a través da web dous tramos inventariados polo catastro no termo municipal de Cabanas: río Eume-Río Covo-O Muíño do Cubo e Pedreiras-Camino dos Chaos. No punto de atención catastral fixemos a mesma consulta e confirmamos que hai un terceiro tramo, onde se sitúa a segunda peaxe que non aparece dado de alta en catastro e polo tanto non hai datos de metros cadrados nin de cualificación de solo. Estesanos pasados Cabanassufriu o catastrazo, e curiosamente houbounha empresa dando de alta bens particulares pero chámnanos a atención que pasase por alto este anaco de territorio tan grande. Como consecuencia disto, suxerímoslle ao goberno local que revise a situación de tributación dos bens da Autopista de peaxe 9, especialmente o tramo desde o camiño dos Chaos a o琳deiro do termo municipal con Fene (incluídas a entrada e saída ao polígono de Vilar do Colo que tamén están localizadas en Cabanas) e que reclame os atrasos que correspondan no caso de non haber tributación durante os pasados catro anos.

Resposta Alcalde: como xa lle contestei noutras ocasións, este Concello sempre intentou cobrar a Autoestradas o que nos permite a lei, estivemos nese proceso 2008-2009 desde a Deputación da Coruña cunha ordenanza que despois non saíu para adiante e vamos volver a intentalo se conseguimos socios que nos acompañen, non pode pensar tan negativo nunha institución como o concello de Cabanas, as xestións que se fan sempre é pensando na mellora xeral dos servizos.

A continuación a Presidencia levanta a sesión sendo as vinte e unha horas e quince minutos da cal estendo a presente acta, e do que eu Secretario, dou fe.

Vtº e prace.

O Secretario

O Alcalde